



Recomendación á Mancomunidade de concellos de Santa Agueda sobre a finalización dos contratos por obra ou servizo, así como sobre o deber de colaboración coa Institución do Valedor do Pobo.

Expediente: A.4.Q/014/17

Santiago de Compostela, 19 de novembro de 2018

Sr. presidente:

Nesta institución iniciouse expediente de queixa como consecuencia do escrito de D<sup>a</sup> [REDACTED] relativo á relación laboral que mantivo coa Mancomunidade de Santa Águeda como psicóloga no CIM.

#### ANTECEDENTES

1. No seu escrito, a interesada indicábanos que a finalización da relación laboral coa Mancomunidade produciuse de forma irregular, pois sendo un contrato por obra ou servizo, o seu despido produciuse a pesares de que o programa seguiu en funcionamento. O data de cese correspondeuse coa comunicación por parte da subdelegación de Defensa en Pontevedra de activación para prestación de servizos como reservista voluntaria. No proceso selectivo realizado en decembro de 2016 para a cobertura do posto de asesora xurídica que viña ocupando, rexistráronse irregularidades na baremación de méritos así como no desenvolvemento mesmo do proceso.

2. Tras pedir informe á Mancomunidade, a administración remitiunos un primeiro escrito remítese copia da acta resolutoria das alegacións presentadas por vostede sobre a puntuación obtida no proceso.

3. Analizada a anterior información, consideramos que este era incompleta pois quedaban varias cuestións pendentes de aclaración e que substancian unha parte fundamental do expediente de queixa. Tales cuestións se concretan nos seguintes apartados:

*a. A interesada indica que non se procedeu comunicación algunha da finalización do contrato o día 30-09-16 ata que a Mancomunidade tivo coñecemento dun escrito da Subdelegación do Goberno de Pontevedra sobre a activación para prestación de servizos polo carácter de reservista da interesada. Non existiu nin comunicación previa nin finiquito. Por outra parte, as compañeiras contratadas cunha vinculación similar, si continuaron a súa prestación de servizos mediante prórroga.*

*b. A subvención que financiaba os contratos das persoas empregadas no programa do CIM mantiña os costes de persoal ata o 31 de marzo de 2017, sen que houbera interrupción da obra ou servizo que xustifica o contrato laboral asinado coa reclamante.*

*c. En canto ao novo proceso selectivo, a interesada alude a que a persoa á que se lle adxudicou a praza non ten experiencia en materia de xénero, tan só dous meses nos que cubriu o posto sen que se realizar un proceso obxectivo.*

*d. Non se clarifica os motivos polos que os contratos de consultoría non se axustan ao tenor literal do establecido na base 8ª que rexe o procedemento no seu artigo 10 punto 3.*

Sobre ningún dos puntos anteriores chegou a obterse información algunha, dado que pasados xa varios meses, e tras múltiples requirimentos e intentos de contactar coa Mancomunidade para tratar de obter información, a día de hoxe, non obtivemos resposta algunha.

## ANÁLISE

Tras a investigación realizada, consideramos que a información remitida pola Mancomunidade de Santa Águeda non resulta suficiente, a pesar de tela requirido de xeito reiterado. De feito, nesta Institución hai un expediente similar con idénticos resultados de falta de información.

Dado o tempo transcorrido, demorado en exceso confiando na remisión da totalidade dos informes que afectan aos dous expedientes, e esperando poder discernir o acontecido coa recepción do pedido en ambos, finalmente temos que formular a seguinte recomendación e recordatorio de deberes legais, en base as seguintes consideracións:

1. A contratación dun traballador mediante a modalidade de obra ou servizo determinado esixe que a duración desa vinculación dure mentres a obra o servizo estease a desenvolver. A concreción dun perfil concreto, obxectivo e preciso, que queda perfectamente delimitado no contrato, implica que a duración deste ven determinada precisamente pola realización do obra ou finalización do servizo. Cando remata efectivamente a obra ou finaliza o servizo contratado, previa denuncia o comunicación da administración, é cando remata o contrato. Cando non se producen estas circunstancias, a finalización da relación laboral supón a improcedencia do despido, coa correspondente indemnización.

A continuidade do servizo que fundamentou a súa contratación non cesou en ningún momento, e sobre este asunto, tense pronunciado o Tribunal Supremo en numerosas sentenzas nas que nega a concorrencia da terminación da obra e, polo tanto, da chegada do termo do contrato de traballo, sen que a tal negativa se opoña nin cambios de denominación da actividade, nin renovacións de contratos, nin cambios no financiamento recibido na realización da obra ou servizo que de orixe á contratación laboral.

Nos informes remitidos pola Mancomunidade de concellos “Santa Águeda” non se fai referencia ás causas que xustificaron o despido das traballadoras. Coa información existente, parece evidente que o servizo continuou e os despedimentos resultarían improcedentes.

Neste caso concreto agrávase especialmente a rescisión do contrato xa que este parece vir motivado pola activación da interesada para prestar servizo en unidades, concretamente no cuartel xeral da forza loxística operativa, na súa condición de reservista voluntaria do Ministerio de Defensa. A lexislación vixente obriga á reserva do posto de traballo que estivera desempeñando antes da incorporación o un de similares condicións e igual remuneración na mesma empresa e localidade, e non verán prexudicadas as súas posibilidades de promoción profesional na empresa.

Por todo o anterior, entendemos que o cese da súa contratación resulta contrario á normativa de aplicación, xa non só dende o punto de vista da continuidade da obra ou servizo que xustificaba o vínculo laboral inicial, senón tamén pola conexión directa que se detecta entre a súa chamada como reservista polo Ministerio de Defensa e a comunicación do fin de contrato pola Comunidade.

2. Tamén resulta reprobable neste expediente a falta de información da Mancomunidade. Así, aínda que neste caso concreto recibíronse os dous informe solicitados, o contido das peticións que esta Institución enviou detallaban o tipo de información a remitir, poñéndose de manifesto con especial claridade no escrito de 9 de maio de 2017 (solicitud de informe

complementario). Aínda así, a administración remitiu unicamente datos sobre o proceso de selección de decembro de 2016. Certo é que sobre esta cuestión tamén versaba a reclamación, pero a mesma importancia se lle daba á finalización do contrato da reclamante.

A Lei do Valedor do Pobo establece expresamente no artigo 26 da Lei 6/1984, de 5 de xuño, que o regula, a obriga de tódolos poderes públicos de Galicia de prestar o auxilio e colaboración que lle sexan demandados por esta Institución no curso das súas investigacións e actuacións, obriga que consideramos que no foi atendida aquí na súa totalidade.

### CONCLUSIÓNS

Por todo o indicado anteriormente, considerase necesario, en aplicación do disposto no artigo 32.1 da Lei 6/1984 do Valedor do Pobo, facerlle chegar á Mancomunidade de concellos “Santa Águeda” a seguinte Recomendación:

*Que se revise o procedemento de finalización da relación laboral da reclamante, atendendo ás directrices que a normativa laboral define para os contratos de obra ou servizo determinado e do persoal reservista do Ministerio de Defensa.*

*Asemade, recórdase á Mancomunidade de concellos “Santa Águeda” a súa obriga de prestar o auxilio e cooperación que lles sexan demandados polo Valedor do Pobo nas súas investigacións e actuacións.*

Agradecendo de antemán a acollida ao manifestado nesta resolución do Valedor do Pobo, recordámoslle a necesidade de que no prazo de un mes de conta a esta institución da aceptación da recomendación formulada, no seu caso, e das medidas adoptadas para darlle efectividade, tamén no seu caso.

Ademais, facémoslle saber que, en aplicación do principio de transparencia, a partir da semana seguinte á data na que se ditou a presente resolución, esta incluírase na páxina web da institución.

Saúdao atentamente

Milagros María Otero Parga  
Valedora do Pobo